

Bajramska hutba reisul-uleme dr. Huseina Kavazovića

Sarajevo, 30. mart 2025. godine

Zahvala pripada Allahu, Stvoritelju svih svjetova, Vladaru Sudnjega dana. Iz ničega On stvara što hoće, svemu život daje i sve održava do roka određenog.

On daje mudrost kome hoće, a kome je mudrost data, dato mu je dobro veliko.

On daje vlast kome hoće, a oduzima je od koga hoće.

Poučio nas je da dobro i zlo nisu isto: onaj koji učini i trun dobra vidjet će ga, a onaj ko učini i trun zla vidjet će ga.

Neka je Allahov blagoslov na sve Njegove vjerovjesnike, prijatelje i poslanike, posebno na hazreti pejgambera Muhammeda, donosioca radosnih vijesti, upute i opomene.

On će se zauzimati za ljude na Sudnjem danu.

Molimo Allaha da Svoju milost izlije na njega, njegovu časnu porodicu, sve ashabe koji su ga slijedili u vjeri i sve muslimane i muslimanke koji su se trudili na Božijem putu do kraja svijeta.

Draga braćo i sestre!

U ovo bajramsko jutro radosni smo u našoj domovini Bosni i Hercegovini i drugim zemljama u kojima je naš narod rasut. Ta radost isijava iz naših prsa, jer nam je Uzvišeni podario ovaj dan koji je došao nakon redovnog godišnjeg testiranja naše snage, strpljivosti i ustrajnosti u odabranom mjesecu. Ramazan doista jeste naše vrijeme u kojem pokazujemo, sebi prije svega, koliko smo čvrsti u disciplini, samokontroli, poniznosti, dobroti, milosrđu, snazi karaktera i pokornosti Gospodar. Zato smo jutros ozareni, jer se nadamo Allahovoj milosti i dobroj prolaznoj ocjeni na tom ispitu.

Svako od nas se trudi postići svoj cilj. Naša namjera se očituje u svakom našem naporu, a nagradi se nadamo nakon svakog postignuća. Poteškoće s kojima se stalno susrećemo mogu nam se činiti teškim i neprijatnim, ali nam mogu i pomoći da očistimo svoj nijet i povećamo trud. Sjetimo se da nam je obećano da „poslije poteškoće dolazi last“, olakšanje.

فَإِنَّ مَعَ الْعُسْرِ يُسْرًا إِنَّ مَعَ الْعُسْرِ يُسْرًا

A vjernik nikada ne gubi nadu u Allahovu milost, Njegov sud i znanje.

Poteškoće na našem putu su poput tamnih oblaka, punih munja i gromova, koji, iako izgledaju strašno, u sebi nose dobru vijest o kiši koju iščekuje žedna zemlja. Upravo ti i takvi oblaci donose nam vijesti koje život znače. Pa zar da zbog poteškoća posustanemo na svom putu do cilja?

Naši životi nisu ispunjeni samo kušnjama, mukama i poteškoćama. Nalazimo mi i izvore čiste vode, nepresušna vrela ugodnosti i hladovinu ugodnu.

Allah kaže: *Došao vam je poslanik, jedan od vas, teško mu je što ćete na muke udariti, jedva čeka da Pravim putem krenete, a prema vjernicima je blag i milostiv* (Et-Tevbe, 128).

Poslanik Muhammed, a.s., o svom vasijetu je rekao:

„Ostavljam vam iza sebe dvoje, ako ih se budete držali nećete nikada zalutati: Allahovu Knjigu i moj sunet (moj životni primjer).“

Kur'an je poput nepresušnog hladnog vrela koje napaja žedne putnike. Oni koji mu priđu mogu piti koliko hoće. Oni koji ga čitaju polahko i ustrajno, s razumijevanjem, u njemu će naći odgovor na svako životno pitanje i olakšanje za svaku tegobu.

Allah kaže:

لَقَدْ أَنْزَلْنَا إِلَيْكُمْ كِتَابًا فِيهِ ذِكْرُكُمْ أَفَلَا تَعْقِلُونَ

Mi vam objavljujemo knjigu, u kojoj je za vas pouka. Pa zašto se ne opametite (El-Enbija, 10).

Vjerovjesnikov životni put drugo je iznimno snažno vrelo nadahnuća, uz koje se nudi istinski duhovni odmor, ali i zbiljsko ohrabrenje i nada da je moguće stići do cilja kojem smo se zaputili. Njegov životopis je kazivanje o snazi duha, ustrajnosti u dobru, nepokolebljivoj vjeri i savlađivanju odista velikih životnih tegoba i prepreka. On je svoje prepreke savladao velikom željom, tvrdom vjerom, nepokolebljivom voljom i velikim srcem, punim ljubavi i samilosti.

Uzvišeni kaže: *Vi u Božijem poslaniku imate lijep uzor za onog koji se nada Božijoj milosti i Sudnjem danu, i koji često spominje Boga* (El-Ahzab, 21).

Braćo i sestre!

Uzvišeni nam govori da je on Gospodar puno svjetova (Rabbu-l-alemin), a ne jednog. U Njegovom naumu ne postoje ekskluzivni svjetovi, koji bi isključivali druge. Zli ljudi takve svjetove zagovaraju i žele ih.

Život koji nam je darovan moguć je jedino u različitostima. Takav je Božiji naum. Oni koji zagovaraju jednoumlje, koji podižu zidove i granice, koji dijele ljude, ustali su protiv Boga, ma koliko se na Njega pozivali. Oni svima

donose zlo, a sebi ponajviše. U Kur'anu čitamo Božije riječi, koje su svima objavljene:

وَلَوْ شَاءَ رَبُّكَ لَجَعَلَ النَّاسَ أُمَّةً وَاحِدَةً ۗ وَلَا يَزَالُونَ مُخْتَلِفِينَ

Da je tvoj Gospodar htio, on bi sve ljude jednom zajednicom učinio, a oni će zauvijek ostati različiti (Hud, 118). Različitost je temelj života i princip najvišeg reda u kosmosu. U toj Božijoj mudrosti je pouka za one koji su razumom obdareni.

Put istinske vjere je put ljubavi, mira i inkluzije, a put lažne vjere je put mržnje, prijetnje i ekskluzivnosti. Isključivost je stranputica za svakoga koji misli da će se time usrećiti. Na našu žalost, valja nam priznati da postoje i takvi ljudi među nama, koji nastoje izgraditi jedan, ekskluzivni, samo njima dopadljiv svijet. To su isključivi ljudi. Oni su prijetnja samom temelju života, i zato im se ne smije povlađivati. Uspiju li u svojoj nakani, to zlo će se proširiti, patnja i stradanje će preplaviti Zemlju.

Poslanik islama je rekao: „Ko od vas vidi ono što je nevaljalo, neka ga otkloni rukom, riječima (kritikom) ili prezirom.“

Ponovo se suočavamo s prijetnjama miru, čije gorivo su podjele i velikodržavni projekti. Kako to u stvarnosti izgleda vidjeli smo devedesetih godina prošlog stoljeća. Memorijalni centar Srebrenica zorni je svjedok onoga što nas čeka ako za njima krenemo. Iskusili smo veliku patnju i nimalo ne sumnjamo da bi nas i danas pogodila.

Braćo i sestre!

Naše polazište u onome što radimo i u što vjerujemo treba biti Božija riječ. U Kur'anu se kaže:

وَالصُّلْحُ خَيْرٌ *A dogovor je bolji.*

Naša obaveza nije čekati priliku da se stvari same od sebe poprave. Naša obaveza je raditi da se ta prilika ukaže. Ništa neće doći samo od sebe.

Raduje me da naš obični čovjek razmišlja svojom glavom i gleda svoj interes. A njegov interes su mir, red i poredak.

Mnogo puta smo ponovili da je ova naša domovina, Bosna i Hercegovina, naša zajednička kuća, prostrana za sve njene sinove i kćeri. Ne dozvolimo da oni koji pale vatre ovih dana razbuktaju ih i pretvore u plamen mržnje, u kojem ćemo svi stradati. Mir, pravda i stabilnost moraju biti suštinske vrijednosti, iza kojih ćemo svi stati kao jedan. Sve drugo je manje važno, ako ove temelje pogubimo. Država ne smije biti pasivna u odnosu na one koji pozivaju na anarhiju, prijetje i šire teror. Naprotiv! Za takve i postoji država i njen aparat, koji mora djelovati.

Vjerujem da među nama, u svim ljudima u Bosni i Hercegovini, ima dovoljno razumnih i mudrih ljudi, koji imaju vjere, znanja i morala da grade mostove među nama. Pozivam ih da budu glasniji, odvažniji i smjeliji. Moramo pobijediti strah koji nam se nameće i kojim se vlada. Naš put je put mira, zajedništva, solidarnosti i prihvatanja naših različitosti.

Neka nam naši praznici budu vrijeme susretanja i zajedničke radosti: po našim selima, mahalama i gradovima. Neka takav bude i ovaj Bajram! Pokažimo jedni drugima koliko nam je stalo do naših dobrih komšija i našeg komšiluka. Ojačajmo svoj komšiluk i pretvorimo to u novu šansu. Izgradimo ga još jačim i još otpornijim na izazove. Razmišljajmo o sebi svojim glavama i vodimo računa o našim interesima i našim životima.

Molimo Uzvišenog Boga da u naša srca unese svjetlo vjere, ljubavi, povjerenja i praštanja.

Molimo Ga da nas sačuva velikih kušnji i belaja, da nam pomogne da u naše zajednice donesemo mir i međusobno poštovanje.

Molimo Ga da nas prosvijetli ljubavlju prema našoj porodici, rodbini, prijateljima i komšijama.

Gospodaru naš, pomози nam da svoju čeljad podižemo u miru, da ih učimo da budu dobri ljudi, okrenuti dobru i zajedništvu.

Zahvaljujemo Ti na nebrojenim blagodatima kojima nas obasipaš: blagodatima vjere, zdravlja, nafake, porodične ljubavi, znanja i domovine.

Tebi se utječemo od svakog zla i zle strasti, koji se začnu u našim dušama, i od ljudi.

Pomози nam da sačuvamo mir među nama i mirnu nam domovinu Bosnu i Hercegovinu, zjenicu oka našega. Amin!

Svim muslimanima i muslimankama u domovini Bosni i Hercegovini, u Sandžaku, Srbiji, Hrvatskoj, Sloveniji i u našoj dijaspori čestitam Ramazanski bajram. Želim da ga u miru i rahatluku provedemo sa svojim najmilijim, prijateljima i komšijama.

Molim Uzvišenog Allaha da vam podari dobro zdravlje i da budete uvijek u Božijoj zaštiti i Njegovom rizaluku.

Molim Ga da bolesnima da zdravlje, slabim i iznemoglim snage da savladaju svoje poteškoće, svima nama lijepu i obilnu halal nafaku.

Molim Ga da u naša srca usadi samilost prema starima i siromašnima i djeci bez roditelja.

Molim Ga da zaštiti naše majke i sestre od nasilja zlikovaca, ma ko oni bili.

Gospodaru naš, pomози nam, popravi nas, ojačaj nam vjeru i uputi nas
Pravim putem.

Bajram šerif mubarek olsun!